

四庫全書

史部

欽定四庫全書

史部

山西通志卷八十六
七十六

詳校官監察御史臣查善長

檢討臣德生覆勘

總校官進士臣朱鈐

校對官助教臣羅萬選

膳錄監生臣倪景寬

欽定四庫全書

山西通志卷八十六

名宦

四

統轄

明

楊巍字伯謙海豐人嘉靖二十六年進士為山西僉事
叅議分守宣府尋為陽和兵備副使隆慶初晉右副
都御史巡撫山西所部驛遞銀歲徵五十四萬巍請

減四之一修築沿邊城堡千餘里檄散大盜李九經黨乞養母去後為吏部尚書歸卒贈少保

栗祁字子登夏津人嘉靖壬戌進士擢山西按察副使因備兵懷隆去郡父老夾車轂泣送者數千人三年後拜山西叅政兩臺交薦大臣閱邊還報稱可大用遂以祁開府北邊為人豐頤重厚舉止雍容美文詞平恕不苛馭下取寬簡而持已獨嚴所至有廉名以小疾遂不起

秦可大咸寧進士歷山西叅議分守口北隆慶二年擢
本省副使兵備陽和轉四川副使五年尋陞山西行
太僕卿兵備寧武所至皆有政績

趙孔昭邢臺人進士隆慶間巡撫山西持大體不責苛
細巡邊往復送迓止於臺前一揖諸司道府縣贖鍰
責令掛號分外不博一錢至厄塞險平城障修廢儲
糈虛實士馬肥瘠徧歷三關靡所不周

宋纁字伯敬商邱人嘉靖三十八年進士為御史隆慶

初巡按山西詣達陷石州將士捕七十七人當斬鱣
訊得其誣釋者殆半靜樂民李良雨化為女鱣言此
陽哀陰盛之象宜進君子退小人以挽氣運上嘉納
之萬厯中為戶部尚書嘗以山西連歲荒賴社倉獲
濟請推行之天下以俸供為糴本不足則勸富人或
令民輸粟給冠帶上稱善鱣仕至吏部尚書卒謚莊
敏

王世貞字元美太倉人生有異稟書過目終身弗忘嘉

靖二十六年進士隆慶中繇浙江右叅政晉山西按察使有廉能聲母憂歸萬厯中仕至南京刑部尚書二十一年世貞始與李攀龍協主文柄攀龍卒獨操其柄二十年才最高地望最顯其續五子篇則陽曲王道行為首云

劉奮庸洛陽人嘉靖三十八年進士穆宗初以裕邸舊恩為尚寶卿隆慶六年三月疏譏大學士高拱附拱者謂奮庸久不徙官怏怏風刺被謫兩月神宗即位

擢山西提學僉事秉義甚高量復宏遠視諸生如子弟晉寺人如辟疆園者數處雖掃徑延之不往也其耿介又如此

薛亨字道行韓城人隆慶間進士授戶部主事督餉賦金粟各半屬當欸貢又戊卒築堤當倍給議加賦執不可裁甲馬芻秣溢額者大司徒嘉其能著為令改兵部武選司擢山西提學僉事教先德行而後文藝以齋膳之美置學田周士不給者遷副楚憲過家以

其祿為宗人輸租置義田義學義塚既入楚正經界
繩兼并商無濫出吏無橫歛民困大蘇冬如京師計
吏斥虎冠若而人寬小吏斗食以下不問遷四川叅
政奉檄問播寇楊應龍罪錮之應龍詭以征倭自贖
當事者飭法許之陰行金於亨家亨以聞兩臺言寇
反覆以早為備後數年播事潰裂卒如其言遷按察
使治汾州強宗斂手受要束乃增陴浚隍請陞州為
府彈壓之平獄數十百人遷河南轄汰筦庫宿弊為

忌者所議坐罷歸署所居堂曰敬忍於世事一無所問
宋應昌號桐岡會稽人嘉靖乙丑進士初授絳州歷陞
山西副使精心救荒禱雨用春秋繁露法有奇應龍
見於甕及猗氏壇井中鱗角皆具蒲州水噉城城圯
操丈祭之水驟落三尺其他編審義倉鄉約保甲上
下安之後陞河南左叅政終工部右侍郎改右都御
史經略乞歸

李采菲字君采號臨江河間人嘉靖乙丑進士由行人

歷陞山西行太僕寺卿整飭寧武邊備山西布政使
叅政分守冀南道累晉右副都御史巡撫山西在晉
久於閭閻疾苦長吏賢不肖邊關隘塞吏情向背如
燭照數計故諸措注無弗當機宜協輿情者未幾罷
歸

侯於趙字宗度嘉靖乙丑進士授平陽府推官清介執
法多所平反歷陞山西左布政未幾擢都御史巡撫
本省時以順義王諱達物故部落內關於趙慮有意

外多方宣諭陰為練兵儲糧之計邊方賴以無虞以母憂去家居十四年而卒

李國士字汝志號正屏亳人由進士歷陞陝西右布政晉山西左布政使藩祿邊餉積弊一清直指惡其抗直以老聞部方擬調而國士拂衣歸絕口不及世事嘗語諸子曰吾官三十年未嘗枉一事私一錢凡歷任不為前人玷不為後人危爾曹其識之

郭子章號青螺江西泰和人進士萬厯初山西按察使

甄別廉貪辨明冤抑尤留意風教禁侈靡汰浮食抑
強宗懲橫暴悍卒驕弁皆祇畏斂跡一路肅清時手
著聖門人物志十二卷刊頒諸生以示觀摩尋陞去
後巡撫兩廣以邊功晉兵部尚書

沈子木字汝楠歸安人嘉靖己未進士萬厯乙酉陞山
西右布政使丙戌轉左晉中大饑仿鄭俠繪流民圖
奏上得捐帑金十萬為賑命吏治粥以飼餓人全活
者甚衆丁亥晉右副都御史巡撫山西提督雁門等

關軍務在晉三年緩鞭扑戒浚削植羸困抑豪猾敦
節儉下吏肅然其飭邊備則修障殖穀明賞申約復
屯政通鹽利清尺籍作士氣除戎器事事覈實制府
上其功賜金綺者三入為兵部右侍郎以父年及耄
亟歸省後疏陳建文帝久缺祀不報時論譴焉終南
京右都御史稱疾歸

王象坤字子厚山東新城人嘉靖四十四年進士萬歷
中歷官山西左右政使有清操都御史溫純請顯陟

一人以風天下謂莫如象坤云

孫維城號衛字東郡丘縣人隆慶辛未進士壬辰以治
行第一陞山西按察副使晉叅政又晉按察使寇小
酋安免恃驍健挾市龍門請以五千鐵騎待命關下
維城知其虛實禁止之乃獻出邊屬夷自贖毋敢挾
市幕府上其功晉右布政使移守宣府與中丞同心
共事謀畫相叅夷人關市乞賞一切裁以故事一餅
一嚮不得浮予歲積撫賞羨金十四萬及軍市租五

千皆充年例將吏悅服遷布政庚子寇延綏進僉都御史開府榆林以疾卒於軍

呂坤字叔簡號新吾河南寧陵人萬厯甲戌進士授襄垣縣知縣襄垣劇尚嚴明期年調大同大同貧尚撫字培植善良裁抑豪橫兩地甚德之先是襄垣土豪某被坤大創去之日送數百里謝曰蒙創誨令而後不復犯法矣知大同時有以人命坐抵以其姻鄰邑大紳向坤言之坤言獄已成不可反其不受請託如

此陞吏部主事轉郎署出為山東叅政陞山西按察使陝西布政旋陞山西巡撫正己率屬自藩臬及承差吏胥皆有明職條約饋遺贖羨盡杜絕之尤加意蒙養孤寡無依者復嚴邊防迄後遵成法不廢尋轉兵部左侍郎引疾乞休歸卒贈刑部尚書賜祭塋

李維楨字本寧湖廣京山進士由庶吉士授給事中歷提學副使所至有聲萬厯間陞山西按察使明斷如神不事苛刻每以弼教明刑為心敦請耆儒纂修山

西通志親加考核當時稱為信書終南京禮部尚書
文章詞賦與中原七才子先後齊名著大秘山人集
行世

魏允貞字懋忠南樂人萬曆五年進士二十一年以右
僉都御史巡撫山西允貞素剛果清操絕俗以所部
地瘠民貧力裁幕府歲供及州縣冗費以其銀數萬
繕亭障建烽堠置器市馬易粟又奏免平陽歲額站
銀八萬以所省郵傳羨銀補之雁門平定軍以逋屯

糧竄徒奏除其租招令復業岢嵐互市省撫賞銀六萬汾州有兩郡王宗人與軍民雜處知州秩卑不能制奏改為府時以款市弛邊政獨勤視要害築邊牆萬有餘丈政聲大著上亦數嘉其能會詔中官張忠採礦山西抗疏極諫不報已西河王知燧請開解州安邑絳縣礦以儀賓督之指揮王守信請開平定稷山諸礦允貞恐民愈擾請令忠兼領亦不納又請召還王家屏等疏留中以久次晉左副都御史中官孫

朝復以權稅至每事裁抑會忠杖死太平典史武三傑朝使者逼殺建雄驛丞李逢春又抗疏暴其罪朝怒劾允貞抗命沮撓時先下朝疏吏部尚書李戴都御史溫純等力稱允貞賢請下允貞疏平議並留中軍民數千人恐允貞去相率詣闕懇寬兩京言官亦連章論救乃兩置之明年忠以夏縣知縣袁應春抗禮劾貶之允貞請留應春不報時疏乞侍養二十上廷議以敕使害民非允貞不能制固留之五月請益

力始聽歸士民為立祠已閱視者奏守邊勞即家晉
兵部右侍郎尋卒天啟初追諡介肅

吳仁度字繼叔金谿人悌之子也萬厯十七年進士累
遷右僉都御史巡撫山西砥庶隅務慈愛與魏允貞
齊名仕至工部左侍郎致仕卒

周繼昌江南無錫人萬厯間以進士督學山西風儀超
朗植性剛明閱文高下悉當遇諸生訓誨調濟有如
子弟至有弗檢立繩之法晉藩欲以威命凌一生力

持獲免郡邑長吏善教養士者甄異之摧抑者訶斥
之言不近名行不偶俗僚屬擬其人有雲霄品格金
玉文章之語公始督學楚凡三校士始終謝請囑嘗
諭諸生以方今公道惟有文衡一事因指天日明心
轉楚叅議不赴歸

沈人种嘉定進士萬厯間分巡冀寧道修理城池均平
地糧定襄士民甚德之

麻溶宣城人進士萬厯間以戶部郎中分守冀南道性

甘淡薄善於判訟改府創學調停得宜大有功於汾
陞河南右布政

賀邦泰丹陽進士萬厯間分巡冀南道寬厚中有執持
以文學調本省提學歷官廉使

霍維蓋曲周進士萬厯間分巡冀南道旌節孝戢強橫
以正人心移風俗為急務人咸以古君子稱之

侯世卿武強進士萬厯間分巡冀南道實心為民值大
歎開廠煮粥借無礙官銀乞糴於河東以平價全活

甚多累官布政使

龍膺字綸隱湖廣武陵進士博學有才幹長於詩詞萬
厯間分守河東道絕饋遺禁贖鍰除暴安良每所履
州縣進父老諸生誨以孝弟力田之義夜輒潛至城
頭察有讀書聲及紡績聲次日即給以燈油之費聞
有酗酒肆惡者大為懲創兇暴屏跡良善鼓舞轉寧
武道修理邊牆興起學校百廢俱舉改甘肅道陞太
常寺卿

王三才蕭山進士萬厯間督學副使文名擅海內居心
廉介以空缺銀兩置儒學常平倉以濟寒士又創建
太原平陽考場歲省千金陞本省叅政

梅友松內江人進士萬厯間分守河東道練達吏治洞
徹人情除奸貪疏寃滯機略雄沉兵民感服累官總
督宣大軍務

趙燿掖縣進士萬厯間分守河東道清嚴狷介人不取
干以私累官遼東僉都御史

詹思虞常山進士萬厯間分守河東道新學校以造士
改教場以練兵強幹有為遠近瞻望其風采

喬學詩東阿人進士萬厯間分守河東道興廉懲貪愛
民作士每以篤誠醇正率下人亦不敢欺陞廣東布政
陳儒新建進士萬厯間分守河東道持已清嚴風紀振
揚豪強斂跡境內肅然陞雲南叅政

張夢鯉萊陽人萬厯間糧儲道督通省田糧派有額徵
如期革櫃頭為官收之例晉民稱便後任右轄董理

鑄錢其利大行纂修賦役冊書悉出手裁永為經制
後任左轄各屬進解京邊銀不入司祇以文檄相轉
給宗祿均鹽鈔省班價不飮一毫餘羨咸稱頌之

趙文炳任邱進士萬厯間巡按摧強抑暴豪惡屏跡官
僚望之凜然時有督稅監居省會甚暴橫文炳箝制
之不敢肆時有鐵面之稱行日不持一錢捐贖金萬
餘散郡邑立養廉倉收息以賑寒士

呂三才山東臨朐進士萬厯間山西督學道閱文知人

心術及富貴貧賤功名遲速歷歷不爽戊午科榜中式皆試文評語有中字者士子稱為神明陞本省叅政朱爵開州人為吏科給事中諫三王並封劾輔臣趙志臯張位私同年羅萬化為吏部坐謫山西按察司知事卒天啟中贈太僕寺少卿

翟鳳翀字凌元益都人萬曆三十二年進士為御史抗疏極論中官呂貴冉登邢洪罪謫山西按察司經歷與給事中郭尚賓號二諫後為兵部右侍郎巡撫天

津卒贈兵部尚書

鄭國昌邠州人萬曆三十五年進士歷官山西叅政崇禎元年以按察使治兵永平遷山西右布政使上官奏留之三年正月殉城一門盡死贈太常卿祭葬蔭一子

麻僖慶陽人萬曆三十五年進士為兵科給事中四十五年京察以僖倚附東林謫山西按察知事後仕至太常卿賊陷慶陽不屈死

楊松河南衛人為御史巡皇城劾尚膳少監黃雄詐稱
駕帖鐫三級給事御史交章救不納謫山西布政使
照磨萬厯中終山西副使

李徵宇任邱人萬厯三十八年進士歷官山西按察使
罷歸崇禎九年以殉難贈卹

白希繡延安人萬厯進士由魚臺知縣擢吏科給事中
丰裁峻峻廉隅自矢久之出為叅政陞山西巡撫都
御史墨吏望風解組

蔡復一字敬夫同安人博學善屬文萬厯二十三年進士光宗時為山西右布政使清介自持天啟中總督貴州雲南湖廣軍務卒橐無餘貲諡清憲

王豫立字定父涇陽人萬厯間進士歷稷山嵩縣知縣政績卓然擢南京刑部主事改北禮部為儀制司諸藩襲封事代藩寵妃欲以支子易嫡謀已就獨豫立不從兩疏請之始得正名後襲爵之儲以魚鮓藏金三千金報謝豫立啓鮓見金即叱來人驅之門外竟

不報函尋備兵霸州轉山西平陽道擢按察使正己
率屬墨吏猾胥皆為斂跡陞河南左布政使出納惟
允百弊釐革無何有南光祿卿之命束裝旋里時璫
燄方熾上疏請休熹宗執疏疊念曰庶官庶官不准
辭而豫立再疏請休益懇堅卧不起自是悠游林臯
者十年賙急恤難施予不倦鄉人咸德之

文翔鳳字天瑞陝西三水人萬曆庚戌進士天啟間以
副使提學山西力振晉人萎薈之習以劾魏璫回籍

卒翔鳳以辭賦為專門純學覃思腐毫必欲追配古人詩離奇暮元可與劉乂馬異關險令三晉士振奇者猶多祖其習云

曹暹岐山人天啟間進士任猗氏知縣民感其德巡按江淮振厲風采允稱鐵面叅議冀寧平晉藩之亂釋久沉之寃及告歸寇攻岐城出夙養丁壯守禦賊喙駭而去岐城賴以安全

來復字伯陽陝西三原進士天啟初分巡河東道文武

長才經濟偉略時將多事預為城守計所歷州縣必
驗臨城池督責修理後十數年流賊入晉平陽諸城
不為賊陷者皆復力也歷陞布政使所至治行卓越
復穎悟過人文詞琴奕書繪皆臻其妙即醫卜星占
靡所不精至不拜魏祠人尤稱之

鄒嘉生直隸武進人萬厯間進士重氣節有操守不肯
附人崇禎初山西按察使釋繫囚辨冤抑不事苛察
光明正大人不欺欺至革淫祠禁侈汰風紀振肅吏

畏民服

祝徽江西臨川進士崇禎初山西巡按懲貪興廉法紀
振肅禁饋遺却贖羨以餒銀令各州縣存百兩為養
廉資本性好題咏所履州縣公署多親書聯額

蘭剛中字坦生陵縣人崇禎四年進士繇南京給事中
遷山西副使甫蒞任流賊入城被執說之降大罵曰
豈有蘭坦生屈膝求活者乎賊殺之首既墮復躍起
大餘賊皆辟易

吳姓字鹿友揚州興化人萬厯四十一年進士崇禎七年九月召對稱旨繇大理寺丞超擢右僉都御史巡撫山西姓歷陳防禦邊寇練兵卹民四難及議兵議將議餉議用人四事每歲暮扼河防秦豫賊連三歲無一賊潛渡以間修築邊牆八年四月上疏言晉民有三苦一苦凶荒無計餬口一苦追呼無力輸租一苦殺掠無策保全繇此悉為盜請蠲最殘破地十州縣租上即勅議行戶部請稅間架力爭不聽秋以朔

忻代之役鐫五級宣大總督楊嗣昌大同巡撫葉廷
桂鐫三級俱戴罪視事部議開山西礦極陳五害寢
之山西大盜賀宗漢劉浩然高加計皆前巡撫戴君
恩所撫擁衆自恣姓陽為撫慰而密令叅將虎大威
劉光祚等圖之以次皆被殲牲行軍監二白旗脅從
及老幼婦女跪其下即免死全活甚衆在晉四年軍
民戴若慈母謝病歸後仕至東閣大學士

曹文詔大同人勇毅有智略崇禎中為延綏副總兵賊

渠王嘉印久據河曲四年四月克其城嘉印南走追
斬之陽城南山又擊斬照燈子於稷山擢總兵官五
年關中巨寇略盡賊見陝兵盛多流入山西其魁紫
金梁混世王姬開鎖八大王曹操闖塌天興加哈利
七大部多者萬人少亦半之蹂躪汾州太原平陽御
史張宸極言賊自秦中來秦將曹文詔威名夙著士
民為之謠曰軍中有一曹西賊聞之心膽搖且嘗立
功晉中而秦賊滅且盡宜勅令入晉協勦於是令陝

西山西諸將並受節制六年正月敗賊於霍州孟縣
壽陽二月斬混世王於碧霞村又敗賊於方山臺孟
忻壽賊盡平巡撫許鼎臣命軍平定備太原東張應
昌軍汾州備太原西文詔連敗賊太谷榆社太原賊
幾盡上以文詔功多勅所過地多積糗糧以犒并勅
文詔速平賊監視中官劉中允言文詔勦賊徐溝孟
定襄所司不給米反以礮石傷士卒即下御史按問
閏三月又大敗賊於澤州賊走自沁水潛師邀擊之

斬首千餘四月夜半禦賊於澤之潤城斬千五百級
又敗紫金梁老回回於武鄉過天星於高澤山又敗
賊於黎城五月遣中官孫茂霖為內中軍又敗賊於
沁水擒其魁大虎又敗之遼城毛嶺山西賊既累敗
乃避文詔鋒多流入河北命移師往討初文詔在洪
洞忤里居御史劉令譽及是令譽按河南語復相失
文詔拂衣起而叱之令譽遂以石砧土官馬鳳儀之
敗劾文詔部議調大同七年七月全懷仁城十一月

與制撫並充軍邊衛山西巡撫吳姓薦文詔知兵善
戰請用之晉中乃命為援勦總兵官立功自贖時部
議勅馳勦河南姓抗疏力爭請令先平晉賊後入豫
不許而文詔以姓有恩取道太原為姓所留會賊高
加計已殲乃整兵南八年六月戰歿於陝真寧之湫
頭鎮贈太子太保左都督建祠春秋致祭文詔忠勇
冠時稱明季良將第一其歿也賊中為相慶云

艾萬年米脂人繇武學生從軍積功至神木叅將崇禎

四年從曹文詔復河曲又從文詔連敗賊點燈子於桑落鎮花地窰露露山五年山西告警又隸文詔東征與李卑一月奏五捷又與賀人龍敗八大王掃地王兵六年賊將東遁連破之延家山亢義村賈寨村擢副總兵七年正月捕殺王豹五與其黨領兵王生擒翻山動姬開鎖掌世王給事中張第元請錄萬年功萬年適以疾歸後戰歿於寧州之襄樂

虎大威榆林人勇幹嫻將略累官山西叅將崇禎三年

冬從總兵尤世祿擊王嘉印於河曲力戰被傷五年
從總督張宗衡勦賊陵川潞安陽城沁水連勝之六
年殲九條龍於介休又自輦落山東入屢敗賊尋移
守平陽七年巡撫吳牲察諸將中惟大威與猛如虎
沈毅可屬兵事委任之冬扼賊渡河八年三月射殺
高加計牲薦大威如虎二人忠勇晉大威副總兵冬
以扼賊功加署都督僉事十年春代王忠為山西總
兵官疏言諸將討賊零級不可取生口不可貪封域

不可限上採納之十一年兵部甄別以稱職增秩十
四年中砲死於汝寧大威為偏裨最有聲卒死王事
猛如虎塞外人家榆林積功至遊擊崇禎五年敗邢紅
狼解高平圍六年敗姬開鎖於壽陽又從曹文詔斬
混世王破來遠寨范村賊又擊殺九條龍勦交山皐
樂山賊山西警漸息七年馘五條龍於沁源如虎驍
果善戰與虎大威齊名許鼎臣戴君恩吳姓相繼為
巡撫並委任之以功晉叅將冬扼河濱八年二月斬

劇賊高加計山西賊盡平姓薦加副總兵冬以防河
功加署都督僉事連歲防河及援勦河南勞績甚著
十四年南陽陷衝擊賊搃死

袁繼咸字季通宜春人天啟五年進士崇禎七年春為
山西提學僉事才身赴任較閱公明聲望大著巡撫
吳姓薦其廉能請加優擢而巡按御史張孫振以請
屬不行銜之特疏誣繼咸賊私事上怒逮繼咸責姓
回奏姓極稱繼咸賢斥孫振誣詆諸生聞繼咸逮羣

隨至都伏闕訴寃繼咸亦列上孫振請屬狀及其贓
賄數事都察院言孫振倒置是非大負巡方職有詔
逮訊繼咸得復官孫振坐謫戍天下快之繼咸後為
兵部右侍郎兼右僉都御史總督江西湖廣應天安
慶軍務駐九江殉職

宋統殷山東即墨人崇禎間以進士任山西巡撫時流
寇蜂起統殷親督師擊於長子勝之賊走沁水犯竇
莊為里人張道濬所扼賊窘甚又聞秦師且至因號

呼壁下求撫張令還所掠散遣徒黨當為言撫軍貸
爾死賊如命拔營而西成就約束惟八大王闖塌天
五營不受統殷偵知之引師襲其營賊渡河而南次
年復來統殷與王兵備肇生過之陵川賊至殊死鬪
互有勝負會夜與賊爭險對營兩山頭賊由間道潛
出其上大譟師遽潰統殷與王俱走適張總督宗衡
駐高平統殷以師畢會大破賊於桑子鎮賊復走沁
水未幾解任去以許昂臣代之

田時震富平人天啓二年進士崇禎中忤吏部尚書王
永光為山西左叅議就遷至右叅政罷歸十六年冬
流賊陷富平不屈死

吳阿衡裕州進士崇禎間分守河東道偉質長才威望
素著盜賊遠遁地方安靖累遷薊遼總督殉難

汪喬年字歲星遂安進士崇禎間分巡河東道布袍蔬
食自處儉約視民疾苦不啻身受精明練達人不敢
欺常行部有安設豐厚者曰值此民窮財盡之時做

官當為國惜財為民惜命無論其他只此一盆火可
當中人數日餐盡令撒去一時貪墨者皆為斂輯未
幾陞陝西提學累官總督征李自成死於陣

都任字宏若祥符人萬厯四十一年進士崇禎中為山
西按察使性剛毅多忤物月朔諸僚約同朝晉王任
曰會典朔望朝王惟都布二司不及按察按察得糾
舉非法奈何與守土者同朝執不行巡按御史張孫
振誣劾提學僉事袁繼咸任數慰問繼咸贖其行孫

振中以大計貶職歸後飭榆林兵備十六年殉城

許鼎臣江南武進人崇禎六年以進士任山西巡撫鼓
勵將士誓掃寇氛適沁水張道濬設伏三纏四中生
擒賊首滿天星等鼎臣為獻俘闕下並奏功第一為
當時勸已而部議鼎臣駐汾州統岢嵐寧武諸軍凡
汾太遼沁三十八州縣有盜警即以責之

黃世清字澄海滕縣人崇禎七年進士累官山西冀寧
道僉事遷商維道十六年十月殉城贈光祿卿

王肇生山東掖縣人崇禎間以舉人累官分巡冀南道
英爽有膽略練習兵事陵川賊馬小懷作亂親督將
士入險阻搗其巢賊驚潰因議設叅將以資彈壓壬
申流寇將自河南入請兵撫軍扼其衝復與監軍焦
浴總兵曹文詔和輯兵民俾無騷擾三人雅相善生
平虛懷延攬念軍興之際當為國家收羅奇才異能
凡劒客力士有片長者輒結納恐後以勞卒官士民
立祠祀之後贈光祿寺卿

蔡懋德字維立崑山人幼志聖學篤好王守仁書舉萬
曆四十七年進士崇禎十四年十二月為右僉都御
史巡撫山西召對稱旨賜酒饌銀幣十五年春涖任
大盜王冕等為亂討平之總兵徐定國援河南潰而
歸懋德定其亂十月統兵入衛畿輔詔扼守龍泉固
關二關而賊已陷河南將犯平陽境急馳河上禦之
數月至十六年冬賊入潼關陝西盡陷自蒲州北抵
保德二千餘里悉與賊隣恃黃河為限窮冬冰合賊

騎得長驅懋德連章告急請禁旅及保定宣府大同
兵馳赴河干合拒中朝亦以山西為憂廷臣請防河
者甚衆然無兵可援總兵周遇吉鎮寧武僅得自顧
宣大總督王繼謨奉命防河亦不至懋德以疲卒三
千常數十萬強寇日奔走平陽汾州間猶屢挫之大
慶鳳陵吉鄉諸渡十二月岢嵐保德俱告警太原洶
洶晉王手書趣懋德還懋德不得已分兵守二郡以
十八日去平陽越三日賊即渡河副使李士焜知府

張嶙然等棄城先遁俄復還越二日李自成至嶙然
迎降平陽遂陷十七年正月巡按御史汪宗友劾懋
德不待氷泮遽還太原致名城淪覆詔奪官候勘以
郭景昌代之懋德先遣兵拒賊而屬城盡陷反拒官
軍乃與布政司使趙建極諸監司毛文炳蘭剛中畢
拱辰太原知府孫康周署陽曲縣事長史范志泰等
大集城中人誓以死守懋德哭衆皆哭聲震原野罷
官命適至或請出城候代懋德不可曰吾已辦一死

矣景昌即至吾亦與俱死是月晦游騎抵近郊自成
知懋德賢遣使招諭曰撫軍若降吾且大用懋德憤
立火其檄斬使人頭懸城上二月五日賊悉衆薄城
遣部將牛勇朱孔訓王永魁出戰俱敗歿六日自成
具偽鹵簿督衆力攻城上發砲擊之賊多死七日晝
晦大風拔木飄瓦終夜不息守者皆仆懋德知不能
支預草遺表時調陽和兵三千協守剛中慮其內應
移之南關外果叛降賊而部將張雄者守新南門與

賊通懋德召中軍副總兵官應時盛謀將調雄守大南門未幾雄縋城出降語其黨曰城東南角樓貯火器火藥我下即焚樓樓焚宇者悉走賊乘勢登城懋德北向再拜出遺表授贊畫知縣賈士昌命其間道奏聞拔刀自剄為麾下所奪時盛請下城巷戰遂扶上馬時盛持矛突殺數十人至炭市口賊騎充斥時盛呼曰且擁公出西門懋德遽下馬曰我當死封疆汝輩可自去衆復擁懋德上馬至水西門懋德叱曰

汝輩欲陷我不忠耶復下馬據地坐時盛已出城還
顧不見復斫門入曰請與公俱死遂偕至三立祠懋
德就縊未絕時盛釋甲加諸肩乃絕時盛再拜訖即
去弓弦自勒死

趙建極河南永寧人萬曆四十七年進士賊掠永寧五
子皆死累遷山西布政使流賊入城危坐公堂賊擁
至晉王府欲授以官叱曰我天朝方伯乃仕賊耶李
自成令曳出斬之下階連呼萬歲臣失守封疆死有

餘罪自成以為呼已也曳還問曰既呼萬歲何不受
官建極厲聲曰我呼當朝主上寧呼賊耶大罵自成
立殺之趙氏一門竟絕

陳純德字靜生零陵人舉崇禎十三年進士年已六十
矣莊烈帝召進士各時事立擢御史十四年巡撫山
西感上知盡心職業七月部內嚴霜八月大雪民多
凍餒疏請恤因極陳抽練之弊後督畿輔學政十七
年三月二十一日殉職

畢拱辰字星伯掖縣人舉進士繇淮徐兵備僉事移冀
寧被賊執賊適得新刀拱辰睨之問何睨曰欲得此
斫頭耳賊遂取斬之

毛文炳字夢石鄭州人繇進士歷知壽陽榆次縣繇吏
科給事中出為山西兵備副使為流賊所執誘以官
不從抗罵數日被殺妻趙妾李亦投井死子兆夢甫
數歲被掠去士民以忠臣子贖而歸之

周遇吉錦州衛人少有勇力好射崇禎中累功至京營

前鋒營副將加太子少保左都督十五年冬山西總兵官許定國論辟以遇吉代之至則汰老弱繕甲仗練勇敢一軍特精十六年十二月李自成陷全陝將犯山西遇吉以沿河千餘里賊處處可渡分兵扼其上流以下流蒲坂屬之巡撫蔡懋德而請濟師於朝遣副將熊通以二千人來赴十七年正月令通防河會平陽守陳尚志已遣使迎賊諷通還鎮說降遇吉叱之曰吾受國厚恩寧從爾叛逆且爾統兵二千不

能殺賊反作說客耶立斬之傳首於京至二月七日
太原陷懋德死之賊遂陷忻州圍代州遇吉先在代
遇其北犯乃憑城固守而潛出兵奮擊連數日殺賊
無算會食盡援絕退保寧武賊亦踵至大呼五日不
降者屠其城遇吉四面發大砲殺賊萬人火藥且盡
外圍轉急或請甘言給之遇吉怒曰若輩何怯耶今
能勝一軍皆忠義即不支縛我於賊於是設伏城內
出弱卒誘賊入城急下閘殺數千人賊用砲攻城圯

復完者再傷其四驍將自成懼欲退其將曰我衆百
倍於彼但用十攻一番進靡不勝矣自成從之前隊
死後復更進官軍力盡城遂陷遇吉巷戰馬蹶徒步
跳盪手格殺數十人身被矢如蝟竟為賊執大罵不
屈賊懸之高竿叢射殺之復齎其肉城中士民感遇
吉忠義咸巷戰殺賊不可勝計其舍中兒先從遇吉
出關死亡略盡妻劉氏素勇健率婦女數十人據山
巔公廨登屋而射每一矢斃一賊賊不敢逼縱火焚

之闔家盡死自成集衆計曰自此歷大同陽和宣府皆有重兵倘盡如寧武吾部下寧有子遺哉不如還秦休息圖後舉而大同總兵姜瓖降表至宣府表繼至遂決策長驅賊每語人曰他鎮復有一周總兵吾安得至此

應時盛遼陽人起家小校至都督僉事山西巡撫中軍副總兵慷慨仗義都御史中丞蔡懋德深倚之崇禎間閭賊犯太原勢危急部下士數人倡亂時盛庶得

誅之誓衆死守賊帥陳某與時盛有舊於城下誘降
時盛以神鎗擊中賊裒帥嚙指而退城陷復下城
巷戰突殺數十人賊騎克斥知不能免遂同中丞至
三立書院曰請與公俱死先扶蔡就縊北向再拜引
弓弦自絕

國朝

馬柱國遼東人順治元年巡撫山西時流寇據太原城
八月死亡以數十萬計遺黎略無生意柱國統兵至

一鼓破之搜餘孽殆盡始入城輒督兵登陴俾無得入民室安集撫循民稍復業時客兵亟往返供億滋衆柱國先具牛酒迎郊外慰諭再四俾無譁無掠以驚殘氓雖征調頻仍而里閭若不知有兵垂二年遷陽和總制以去

黃徽孚福建晉江人順治元年以進士巡按山西時三晉初定民多竄居山谷徽孚單騎入險阻慰諭俾復業先是闖逆據晉賦役業入強半至是特疏以聞凡

偽官嘗徵者胥為豁免而晉民之死義者胥以其狀
上又嘗綜三晉情勢疏陳四事一曰薦遺佚以求錄
用一曰立師儒以育賢才一曰禁訐告以安窮黎一
曰復站銀以蘇驛困疏入次第舉行當時稱為訐謨
馬

孟喬芳字心亭其先永平人世襲東勝衛指揮同知今
歸化城地也喬芳偉岍善騎射能以一矢墮雙雁為
刑部承政兼梅勒章京管牛錄事順治元年帥師追

賊李自成踰太行定汾潞拔太原遂渡河入關以兵
部右侍郎兼都察院右副都御史總督三邊軍務大
同降將姜瓖變其黨虞印韓昭宣陷平陽號二十八
萬七月喬芳引兵赴援馳赴潼關賊兵拒河守乃佯
置巨艦於上流伐鼓揚旗作欲渡狀而夜率師從下
流徑渡急擊之賊勢披靡戰且走四十餘里比明抵
蒲州賊迎敵喬芳督將士力戰殺賊七千餘人賊棄
城遁遣將復臨晉滎河猗氏解州又合兵圍運城城

破賊黨殲焉遂定平陽晉兵部尚書累加少保卒

贈太保賜諡忠毅

申朝紀遼東人順治二年巡撫山西下車糾劾墨吏十餘人羣僚肅然站銀舊額一十五萬明季裁充餉驛費不足派之里甲至二十萬有奇朝紀廉得其狀疏請仍歸正項驛馬官牧養無得派民勒石郡邑至於清獄囚裁吏典禁胥役私禁人犯革募夫簽報里民胥有實惠晉人立祠祀之

孫茂蘭遼陽左衛人順治四年以生員任山西布政使
時朝議以太原重地特令滿兵駐防所圈民地胥以
廢藩土田給之而屯丁多抗不予租民莫敢誰何茂
蘭痛繩以法始獲安本業滿兵間與民爭所司率分
左右袒茂蘭用情理訊之俾各厭其意以去兵民咸
安泣任六年擢寧夏巡撫去之日攀轅泣送者不絕
祝世昌遼東人順治六年巡撫山西時姜逆作亂晉省
震動世昌性激烈凡從賊者棄城者率竿諸城力請

大兵殄滅需餉數十萬殫慮經畫軍有餘糧民亦
不病科擾事平特疏請豁賦七百萬石徭十萬餘丁
民獲少蘇無何病卒卒之日百姓巷哭後劉撫軍宏
遇博採輿論謂死忠死事其義一也祀忠烈祠中
劉澤潯廣寧人順治間任分巡冀南道持重不擾得憲
臣體姜逆之亂其黨沈遙應蜂擁太行山中澤潯死
之

贈光祿寺卿祀忠烈祠

劉宏遇遼東人順治七年巡撫山西時姜逆初平邨聚
多蹂躪而逋賊如山積宏遇䟽請豁民寢蘇又恤諸
死事家建忠烈祠祀之辛卯鄉試直指以艱愆期捐
俸分給俟試士俾無寒餒壬辰饑遣使散賑復煮粥
城中全活者衆修廟鑄祭器立義塚設養濟院補城
東南樓治宜春拱極迎澤門橋築堤以障汾流俾無
啗城實政次第舉而絕饋遺清衙蠹革市行尤為拳
拳既去民懷其德建祠以報

劉嗣美河南陳留人順治九年以進士按山西性剛毅
彈劾雖權貴不避巡部時微行訪民疾苦奸胥墨吏
憚之弁卒曩占民室民惴惴不敢出一語嚴為科條
令胥出賃直草豆輸會城市黜緣典守以肆勒索庶
得其狀立斃之飭州縣徵賦行易知單民便之其他
懲蠹役裁徭夫甦驛困革行戶民胥感頌焉

班璉字華宇遼東廣寧人順治十二年以貢生分守河
東道有才略夙著威望蒞任初賊張五聚黨數千人

盤踞夏縣山中時時鈔略為民害璉遣人伺動靜具
得要領因令偏裨於賊出沒地伏兵堵截而自統官
軍銜枚疾走徑擣其巢賊嘗恃險阻且疑郡縣官之
懦也不為備驟聞官軍至遑遽出戰不能支奔逸四
散又悉為堵截者擒斬無遺自是民獲安枕後遷陝
西莊浪副使道以去

李之芳字鄴園山東武定州人順治十六年以進士巡
按山西貪墨吏多斂跡而措注鉅細務雅有條理古

所謂清望公望者惟之芳克兼之尋以缺裁回道後
為浙閩總督平耿逆之亂累官大學士卒諡文襄

王庭字言遠浙江嘉興人己丑進士順治十六年任山
西右布政性孤潔以冰蘖之操倡屬吏有晉謁者輒
勗令牧養百姓慎出納吏不得上下其手藩司甚煩
劇庭處以清嚴內外肅然放衙後輒顧四歲孫握筆
作大字灑然樂之尋以裁缺去庭工制義與熊伯龍
劉子壯齊名晉人士多能誦其文者而閭巷亦歌思

不輟焉

李進忠順治間任撫標右營中軍守備死姜逆之亂
詔恤其家祀忠烈祠

董廷儒順治間任督標營旗鼓守備死姜逆之亂

贈都司祀忠烈祠

穆臣滿洲人康熙十五年任山西按察使持法能平遇
訟者輒以善言解之給銀米於獄必親詣按名以給
在任四年

劉元勲咸陽人順治己亥進士康熙間任山西糧驛道以養馬費有正供而晉皆民養嚴禁之委賑大同無漏無冒駐節地有槐一章民號為劉公槐尋致政歸巴哈布滿洲人康熙三十七年任山西按察使精敏習律例性仁恕持法能平而義所不可雖抗論大吏前不少撓尤加意作人立義學數十捐俸增修貢院號舍

聖祖仁皇帝賜清慎勤三字匾尋回旗三晉人至今懷之

李毓柱康熙間任分守鴈平道廉而敏有吏材遇屬吏以禮而不為假借時微行訪奸猾繩以法諸郡邑疑獄未決能剖曲直恤三關士卒預支月給米而俾於附近倉庾載之祀名宦

諾岷滿洲正藍旗人性耿介任戶部時稽覈有法雍正元年以署工部右侍郎巡撫山西先是州縣侵那錢糧者甚多岷力為振刷相地之繁簡與員之能否互易其位以相鈎斂月要歲會胥吏無所售其奸宿弊

一清正己率屬吏治民氣肅然改觀在任一年零九個月以移疾去

河東鹽運使

西魏

辛慶之隴西狄道人少以文學徵對策第一大統中周太祖東伐為行臺左丞時初復河東以本官兼鹽池都將四年東魏攻正平郡陷之遂欲經略鹽池慶之守禦有備乃引軍退河橋之役大軍不利河北守令

棄城走慶之獨因鹽池抗拒彊敵時論稱其仁勇六年行河東郡事九年復行河東郡事慶之本性儉素志量淹和有儒者風度拜秘書監卒

隋

姚暹大業中為都水監先是鹽池患客水暹濬永豐舊渠兼築堤堰自安邑楊家莊西至臨晉五姓湖以入於河客水有所歸至今名其渠曰姚暹渠

唐

裴諤字士明聞喜人寬子大厯中為河東租庸鹽鐵等
使時關輔大旱諤入計代宗召見便殿問諤權酤之
利二歲出入幾何諤久之不對上復問之對曰臣有
所思上曰何思對曰臣自河東來其間所歷三百里
見農人愁歎穀菽未種誠宜軫念問人之疾苦而乃
責臣以權酤孟子曰理國者仁義而已由是未敢即
對也上前坐曰微公言吾不聞此拜左司郎中歷東
都副留守卒贈禮部尚書

韋縱貞元十一年以大理評事知安邑縣鹽池事明審
善斷羣情帖服祀名宦

司空輿為度支判官工部侍郎領度支盧宏正以兩池
鹽法久弊得費不相償使輿檢鉤釐正條上新法即
表為兩池使自是課入歲倍用度賴之

陸位以職方郎中兼侍御史總解鹽池有政績聞於朝
馮興以詹事司直知解州鹽池平直守制阜財有經

韓重華朗州武陵人歷兩池榷鹽使度支使盧坦表為

代北水運使開廢田列壁二十益兵三千歲收粟二十萬石後為左金吾衛大將軍與甘露之難

後周

張崇祐廣順二年為解州刺史兩池榷鹽使多規畫鹽池利害顯德二年改德州又改澤州後在泗州勸李重進舉義被害

宋

范祥字晉公邠州三水人第進士歷官陝西曉達財利

建議變鹽法後人不敢易稍加損益人輒不便以提
點陝西路刑獄制置解鹽累遷度支員外郎權陝西
轉運副使坐城啞兒峽削一官後復官提舉陝西緣
邊青白鹽改制置解鹽使卒嘉祐中包拯言祥通陝
西鹽法行之十年歲減榷貨務使緡錢數百萬其勞
可錄官其子孫景郊社齋郎熙寧中張詠又言古渭
宜建砦詔贈秘書錄一子未官者

包拯字希仁廬州合肥人第進士累官陝西轉運使入

為三司戶部副使解州鹽法率病民拯往經度之請
一切通商販後以龍圖閣直學士權知開封府貴戚
宦官為斂手拜樞密副使卒謚孝肅拯性峭直惡吏
苛刻務敦厚雖甚嫉惡而未嘗不推以忠恕也平居
無私書嘗言後世子孫仕宦有犯贓者不得放歸本
家云

薛向字帥正萬泉人祖蔭入官神宗時權陝西轉運副
使制置解鹽足支十年而歲調哇夫數千向奏損其

數昭陵復土用錢糧五十萬貫石三司不能供億向
舉所闕之數以獻坐事罷數月復為陝西轉運副使
晉使厚陵役費其助如永昭時凡將漕八年所入鹽
馬芻粟數累萬民不益賦其課為最坐事罷知絳州
移潞州神宗知向才累擢至同知樞密院出外卒謚
恭敏子嗣昌亦用吏材奮嘗以綏猷閣待制知太原府
孫永字曼叔長社人第進士歷陝西都轉運使時邊用
不足以解鹽市馬別為一司外臺不得與永奏鹽馬

國之大計使主者專其柄既無以統隸苟為非法孰得而制之元豐中知太原府忻代產鹽苦惡不堪食轉運必欲理之以盜販闌越之罪罪兵吏永言鹽民食也不可禁兵武備也不可闕顧以惡鹽累防兵非計也詔弛其禁元祐中加資政殿學士卒謚康簡李綽元祐間為解令兼鹽事自王峪口築堰防池繇東而北至苦池灘排條山諸谷之水并白沙泛濫之水胥繇池以達於渠後人因名其堰曰李綽堰

趙賀字餘慶開封封邱人舉毛詩及第為大理評事鹽池吏欺緝錢選賀往解州鈎校出入悉得其奸仕至給事中卒賀精明吏不敢欺人目為趙家關謂如關梁不可越也

元

姚行簡太宗癸巳命修理鹽池損壞丙申繪鹽池圖獻於上上可之乃立司於池之北澣曰路村仍命行簡專掌鹽賦

趙炳字彥明惠州灤陽人至元九年為京北路總管時以解州鹽賦給安西王府經費歲久積逋二十餘萬緡有司追理僅獲三之一民已不堪炳密啓王曰十年之逋責償一日其孰能堪與其哀歎病民孰若惠澤加於民乎王善其言遽命免徵焉

鄂屯茂大德時任河東運使建學課士河東運學始於此

高昌羅壘至正九年任鹽運使有善政嘗復解鹽西場均

鹽利州人思其德為立碑頌之

納哈塔德俊至正時擢總河陝鹽使請於聖惠鎮修築鳳凰城即今運城也

布延特穆爾為運使嚴緝私販課獲充鹽丁撈採禁役無得侵擾焉

和爾實司鹺有惠政均派鹽丁車戶時有造船垣山二役免本鎮人不與買零鹽止收官價交課鈔定鹽草價益鹽觔數民便之

明

韓偉瑞安人永樂中太學生擢監察御史巡歷有聲陞河東鹽運使以清慎見稱卒於官

王驥字尚德東鹿人剛毅有膽曉暢戎略中永樂四年進士為兵科給事中使山西奏免鹽池逋課二十餘萬尋遷山西按察使後累官兵部尚書封靖遠伯卒贈侯諡忠毅

楊浩濟寧人繇鄉舉入國學除河東鹽運判官景帝建

大隆福寺嚴壯與大興隆並四年三月寺成尅期臨幸浩抗疏切諫乃止聲藉甚累官延綏巡撫卒

孟淮博野人進士成化間河東鹽運使因池鹽旁行秦豫法難盡行且占種奏討者多不勝掣肘之慮請如淮浙之例遣侍御監臨積弊一清

王臣江西吉水人成化中以河東鹽法為稅額所闕懼滋弊特設巡鹽御史臣以舉人膺命冰蘖自持悉心經畫具得肯綮因為築垣塹以防盜定額課以足邊

歲甫周鹽政大舉及將代商民數千人匍匐闕下願復留得旨俞允以勞嬰病卒商民建忠愛祠與鹽池之神並祀

張泰字世亨祥符人成化戊戌進士以御史監河東鹽課有勢要撓法為奸疏劾去之巡按山西劾罪貪酷吏若干人軍民稱快後晉右都御史總制三邊乞休命未下而卒

余光初門人進士文望冠西臺著作高古視鹺河東別

弊釐奸不畏強禦建正學書院加意作人雖童子亦擇師教之

張士隆字仲修安陽人弘治十八年進士正德六年為御史巡鹽河東劾貪吏鑿平青石槽又建正學書院興起文教後為陝西副使卒

胡瓚餘姚人進士弘治間運司同知才識敏練時場積餘鹽官民俱苦之瓚建議奏請改派稱兩便焉中場收放鹽課多則病民少則病商瓚一歸於平後致政

去

胡止羅山人進士正德六年以監察御史巡鹽河東方肅鹺事適流賊擾亂所至屠掠將至運城運人以城陋欲潰止曉以忠義治兵繕城為死守計賊聞有備不敢近士民賴以安堵立祠祀之

朱裳字公垂沙河人受學崔銑登正德九年進士擢御史巡鹽河東錢寧遣人牟鹽利禁不予累官總理河道卒謚端簡

盧煥光山人進士嘉靖間巡鹽嚴重有方略稱名御史
西姚劇賊聚衆盜鹽為蠹煥不動聲色而靖之興起
人文三省皆蒙教澤學校誦之不衰

伍全安福人進士嘉靖間鹽運使饒有幹濟每見鹽場
掣支強梁挽起懦者被凌躒乃分定車戶派以三場
序以六班魚貫出入衆論翕然稱便

李章四川長壽人進士嘉靖間鹽運使性寬而政和每
值採鹽民私相謂曰勿怖恐李使君知之不日而數

盈馬

劉勲潛江人嘉靖間任運同清而勤戴星掣放無倦色
喻時光州人進士嘉靖間巡鹽時奸民誘宗室亂法者
立置之法興風雨雷雲之祀課士多成名

尚維持羅山進士嘉靖間巡鹽自奉節儉官方肅清商
人以時掣支私販一切斷絕故一年而徵十年之逋
修書院立社學建名宦鄉賢二祠周予衿之匱乏給
老病之資藥瑞鹽盛生禱雨多應人謂盛德所感

李楨新昌進士嘉靖間巡鹽時邊餉火急赤地千里楨體仁行恕正鹽籍遏私販督撈採辦功罪徧喻所司緩刑薄賦且於院前開道樹坊寓賑於役又有教育多士之功

周滋諸城進士嘉靖間巡鹽時值地震之後凡廟祠公署悉為修理池不生鹽已十載餘滋為瀦水以養其源濬流以潤其涸獲鹽十倍於昔且清池築堰雖藩府之怨不恤

王諍永嘉進士嘉靖間巡鹽抗直不阿有古大臣風以冰蘖名堂蓋自砥也值大旱禱雨祈鹽引躬切責甘雨大霽鹽花盛生時鄆茂卿為嵩私人總巡天下鹽政盡括民財以媚上欲加賦河東諍抗議而沮士民至今德之鄆至安邑令治具看席三十餘諍大怒立命撤去務從儉約宴罷即具餞以促其行鄆屏氣而去方啓參巴陵人嘉靖間為運使節已勤民修城而一人不擾掣引而三場均給葺禁垣捕私販民建祠以祀

詹瑩麻城人進士嘉靖間鹽運使幼有志行聘未婚而女失明或謂宜改圖瑩曰我聘而改圖誰復聘者竟娶之是歲擢巍科及為運使多惠政每旱澇有禱必應又常修卓刀等堰裨益不淺

袁士偉肥城人進士嘉靖間鹽運使操守光大兼有通才在司值歲凶道殣相望嘆曰此非朝廷赤子乎乃悉召貧民給以工本令入池撈採課充數年而存活亦以萬計又增秩祀祭器

柳英巫山人進士嘉靖間鹽運使倜儻剛直除猾吏剔弊端勢要豪商莫不斂手屏氣監臨直指亦雅重之為運使九年邊無匱餉囊無餘貲兩入覲皆以廉能課最

郃永春長垣進士隆慶間巡鹽清祿糧以杜奸欺收硝池以弭私販題南陽以復舊輅興書院以羅人才疏河渠以通水利開南場以便撈採俱功之不可泯者林祖述鄞縣進士萬厯間巡鹽慈祥篤實恤商裕國當

開歸割版之日祖述知大司農已有成心置不與辨
事平乃請減鹽課清壓待撈採以時緝捕有法公論
多之

林國相閩縣人進士萬厯間鹽運使蘇商惠民尤加意
於作人創義倉置學田以周貧士刻厚生纂訓問字
錄二書行世

汪以時婺源進士萬厯間巡鹽刻意節儉一以鋤強字
弱為主餘鹽餘銀屢書執奏為民請命省公用銀糴

穀三千八百餘石為賑饑民鹽丁之用又建太陽廟以補正祀之未及

陳于廷字孟諤宜興人萬曆二十三年進士為御史視鹺河東劾權稅太監張忠橈鹽政後歷左都御史卒于廷端亮有守與溫體仁不合卒為所擠

楊師程安寧人萬曆三十八年以御史巡鹽河東以清名著建雨神廟

蔣春芳益都進士萬曆間巡鹽酌立鹺規可垂久遠新

池廟輯志書至今賴之

趙健劍州恩生萬厯間鹽運使姿性聰穎不為左右所欺廉介自持一毫不苟數十年餘猶有道其清者

孫可傑崇陽舉人萬厯間鹽運司同知存心仁恕才猷敏練足國恤商人咸頌德

王世能宣城人萬厯間為運使有惠政恐商困於催科不差役滋擾親督採鹽商人獲利後卒於官商民思之

余彥誠德興人嘗知安祿州永州府當就逮民胥伏闕乞留終河東鹽運使

王建中平湖人萬厯間由省中遷福建按察使謫河東運判持已清廉凡興革大務如壓待進鹽運發遠商等事胥力爭不為勢沮

劉大受泰和人天啟二年以御史巡鹽河東酌量預報裁省添搭刪灘地蘆價清護池侵地取回苦池租銀作餉募兵又有修學甃城諸政

李日宣吉水人天啟三年以御史巡鹽河東修八政橋
建弘運書院於學宮旁

姜思睿字顓愚慈谿人天啟二年進士為御史視河東
鹽政安邑有故都御史曹于汴講學書院擴其堂廡
祀卜子夏王通薛瑄其中以于汴配置田構舍公餘
親蒞講授

張潑樂陵人進士天啟間巡鹽時有窮商五十餘家立
豁其課杜超掣緩預報一切繁費悉行裁省懲積牙

之蠹塋無主之殍報竣後尚留金糴穀幾四千石以備災荒最遺患者朝議加課潑特疏痛陳商苦獲免去之日商民遮道泣送

陳廷謨成安進士崇禎間巡鹽甬銜命入境即禁班迎舖設之擾在任禁劣採親課程清衙蠹調課額俱有成效丁艱歸民立去思碑

王與孚新城進士崇禎間巡鹽寬嚴互用奸宄屏跡革勒民撈採以塞弊竇恤壓待商人以蘇子遺會流賊

近城孚素得民心且執法不貸協力堵防運城無恙
楊繩武彌勒進士崇禎間巡鹽政持大體凡事游刃而
解不假手於左右劾貪吏招逃商又特疏民間疾苦
乞免包差之累賑饑民養貧士捐俸贖以葺文廟池
神廟表忠祠極重武備修城練兵殆無虛日聞秦寇
逼河躬率士卒沿河堵防民賴以安去之日行李蕭
然商民無不嘆泣

楊鶚武陵人進士崇禎間巡鹽時連值歲歉糴米於太

汾秦渭徧給窮民又築敵臺增新兵河南土寇崔惟一聞風潰散又置田贍士以資四民之無告者

盧友竹崇禎間運司同知清潔不染攝總司篆痛革陋規禁衙役覆隱匿又增兵濬濠為城守計臨機應變調度有法

國朝

李因之山東長山人順治五年以官監任河東鹽運司副使清正率屬手不名一錢姜逆之亂殉運城

贈布政司叅議祀忠烈祠

王存鏊山東邱縣人順治五年以選貢任河東鹽運司知事姜逆之亂與運使李運同鄭誓死殉城不為賊辱時稱三烈

贈布政司照磨祀忠烈祠

鄭宏圖遼東人順治六年以國學生任河東鹽運司運同甫涖任值姜逆之亂登陴力守城破死之

贈布政司叅政祀忠烈祠

張鵬翮字運青四川遂寧人康熙二十四年以進士累官河東都轉運運使性清介聞人言貨賄輒厲聲叱之不少假而於鹽政利弊批卻導窾具得要領嘗上議巡鹽使者力請豁免加課略謂河東諸商築畦晒鹽出場販賣僅與淮浙竈戶同科近日淮慶六邑又歸長蘆地勢既狹辦納尤艱今四海昇平大兵盡撤所有軍興以來每引增銀五分應照部文題請停止至加增七分原因淮浙割沒之例謂每引加鹽二十

五舫應入正額按時徵收但時勢既別張弛宜異淮
浙利於鹽多河東利於鹽少故初奉部行諸商即請
認課不願加鹽且割沒之說原以示罰河東山路崎
嶇轉運最難驢馱車載半出人力非若淮浙順風揚
帆一瀉千里舳艫相接便於夾帶也並請題豁以甦
困苦李御史時諫深嘉之亟繕疏上請獲免新加五
分閱數年郝御史惟諫陳乞並免加增七分商民胥頌
皇恩焉鵬翮嘗念己丑之役督築城隍甃甃四面為運

城根本其功尤稱俊偉涖任三年清望著聞擢京卿
以去

郝惟謙直隸霸州人康熙二十八年以御史巡視河東
鹽政時護池渠堰亟修亟圯民力敝於濬築又前准
淮浙例課鹽並加商以引浮於丁鹽多壅滯不願加
鹽請輸課如令甲前院採運使張議入告惟謙復屢
疏陳乞曰包課之情可矜包課之勢難繼若此日浮
徵不豁將他日正額必虧必獲請乃已復立按丁分

工之法縣夫幾挑築渠堰幾并袤廣高深胥釐畫分
工訖各登其名於籍後有塌毀輒按名令修築人胥
以為便因疏諸朝俾永為遵守

山西通志卷八十六

欽定四庫全書

山西通志卷八十七

名宦

五

太原府

周

知徐吾知盈孫魏獻子以為涂水大夫謂徐吾餘子之
不失職能守業者也

賈辛晉人敬王初從籍談荀躒定王子朝之亂魏獻子

以為祁大夫

魏戍獻子庶子獻子為政謂戍不失職能守業以為梗陽大夫謂戍鱗吾與戍也縣人其以我為黨乎對曰戍之為人也遠不忘君近不偪同見利思義在約思純有守心而無淫心雖與之縣不亦宜乎

司馬督字烏王子朝亂督從籍談荀躒帥師定之魏獻子以為平陵大夫

董安于晉人為趙氏臣荀寅范吉射之亂安于告趙孟

先備之簡子奔晉陽時安于力戰敗二氏梁嬰父惡之謂知文子曰不殺安于使終為政于趙氏必得晉國乃使告于趙孟討始亂趙孟患之安于曰我死而晉國寧趙氏定將焉用生人誰不死吾死莫矣乃縊而死知伯從趙孟盟而後趙氏定祀安于於廟初安于為趙氏治晉陽公宮之垣皆以荻蒿苦楚廬之高至丈餘室皆鍊銅為柱質後智伯率韓魏伐趙襄子適晉陽發而用之三國之兵乘城而戰三月不能拔

卒敗智伯軍而禽之國語下邑之役董安于多趙簡子賞之辭固賞之對曰方臣之少也進秉筆贊為名命稱於前世義於諸侯而主弗志及臣之壯也耆其股肱以從司馬苛慝不產及臣之長也端委鞶帶以隨宰人民無二心今臣一旦為狂疾而曰必賞女是以狂疾賞也不如亡趨而出乃釋之

尹鐸趙氏臣簡子使為晉陽請曰以為繭絲乎抑為保障乎簡子曰保障哉鐸損其戶數簡子誠襄子曰晉

國有難而無以尹鐸為少無以晉陽為遠必以為歸
及智伯率韓魏伐趙襄子與張談定所適曰晉陽先
主之所屬也尹鐸之所寬也民必和矣乃走晉陽晉
師圍而灌之沈竈產鼃民無畔意始趙簡子使鐸為
晉陽曰必墮其壘培吾將往焉若見壘培是見寅與
吉射也鐸往而增之簡子如晉陽見壘怒曰必殺鐸
也而後入大夫辭之不可曰是昭余讐也郵無正進
曰昔先主文子少釁于難從姬氏於公宮有孝德以

出在公族有恭德以升在位有武德以羞為正卿有
溫德以成其名譽失趙氏之典刑而去其師保基於
其身以克復其所及景子長於公宮未及教訓而嗣
立矣亦能纂修其身以受先業無謗於國順德以敷
子擇言以教子擇師保以相子今吾子嗣位有文之
典刑有景之教訓重之以師保加之以父兄子皆疏
之以及此難夫尹鐸曰思樂而喜思難而懼人之道
也委土可以為師保吾何為而不增是以修之庶曰

可以鑑而鳩趙宗乎若罰之是罰善也罰善必賞惡
臣何望矣簡子說曰微子吾幾不為人矣以免難之
賞賞鐸初伯樂與鐸有怨以其賞如伯樂氏曰子免
吾死敢不歸祿辭曰吾為主圖非為子也怨自若焉
大戊午趙成侯三年為相伐魏取鄉邑七十三及肅侯
十六年游大陵出於鹿門大戊午扣馬曰耕事方急
一日不作百日不食肅侯下車謝

郄辛魏大夫說苑魏太子語經侯郄辛治晉陽而道不

拾遺

漢

蕭由字子驕東海蘭陵人望之子也舉賢良遷太原都尉治有聲多稱薦者元始中為中散大夫終官

郭伋字細侯扶風茂陵人高祖父解伋少有志行王莽時為并州牧更始素聞伋名徵拜左馮翊建武十一年省朔方刺史屬并州帝以盧芳據北土乃調伋為并州牧過京師謝恩帝即引見并召皇太子諸王宴

語終日賞賜車馬衣服什物伋前在并州素結恩德
及後入界所到縣邑老幼相携逢迎道路所過問民
疾苦聘求耆德雄俊設几杖之禮朝夕與參政事始
至行部到西河美稷有童兒數百各騎竹馬道次迎
拜伋問兒曹何自遠來對曰聞使君到喜故來奉迎
伋辭謝之及事訖諸兒復送至郭外問使君何日當
還伋謂別駕從事計日當告之行部既還先期一日
伋為違信於諸兒遂止於野亭須期乃入是時朝廷

多舉伋可為大司空帝以并部尚有盧芳之警且塞北未安欲使久於其事故不召伋知盧芳夙賊難卒以力制常嚴烽堠明購賞以結寇心芳將隨昱遂謀脅芳降伋乃亡入塞北伋以老病上書乞骸骨二十二年徵為大中大夫明年卒時年八十六

弓里戌為騎都尉建武二年將兵平定北州到太原歷訪英俊大人問以策謀戌見溫序奇之上疏薦焉序後遷護羌校尉死義於隗囂當時以戌為知人

郭丹字少卿南陽穰人更始時舉賢能建武十三年大司馬吳漢辟舉高第再遷并州牧有清平稱轉使匈奴中郎將永平三年為司徒免卒年八十七

馮衍字敬通野王之孫幼有奇才王莽時諸公多薦舉之衍辭不仕著顯志賦以自勵後仕為陽曲令建武六年日食衍上書陳八事帝將召見衆共排之遂得罪西歸故郡

劉瓚字文理平原人遷太原太守郡有豪強中官親戚

為百姓所患瓚深疾之到官收其魁帥殺之所藏匿
主人悉坐伏誅桓帝徵詣廷尉以瓚宗室不忍致之
於刑使自殺

鄧訓字平叔新野人禹少子也少有大志樂施下士永
平中理滹沱石臼河從都慮至羊腸倉欲令通漕太
原吏人苦役連年無成轉運所經三百九十隘前後
沒溺死者不可勝算建初三年拜訓謁者使監領其
事訓考量隱括知大功難立具以上言肅宗從之遂

罷其役更用驢輦歲省費億萬計全活徒士數千人
屢有邊功卒於張掖太守元興元年和帝以訓后父
使謁者持節至訓墓賜策追封謚曰平壽敬侯

蘇章字孺文扶風平陵人少博學能屬文安帝時應舉
賢良方正對策高第為議郎順帝時遷冀州刺史換
為并州刺史以摧折權豪忤旨坐免隱身鄉里不交
當世卒于家

胡芳為并州刺史度遼將軍皇甫規欲退身避第數上

病不見聽會上郡太守王旻喪還規編素越界到下
亭迎之因令客密告芳言規擅遠軍營公違禁憲當
急舉奏芳曰威明欲避第仕塗故激發我耳吾當為
朝廷愛才何能中此子計耶遂無所問

宋果字仲乙扶風人性輕悍喜與人報仇為郡縣所疾
郭林宗乃訓之義方舉以禍敗果感悔遂改節自飭
後以烈氣聞辟公府侍御史并州刺史所在能化

鄧盛為并州刺史郡人路佛少無名行而太原太守王

球召以補吏郡吏王允固爭球欲殺允盛聞之馳傳辟允為別駕從事允由是知名而路佛以之廢棄

趙岐字邠卿京兆長陵人少明經有才藝仕州郡以廉直疾惡見憚舉理劇為皮氏長抑強討奸大興學校會河東太守劉祐去郡而以中常侍左悺兄勝代之岐恥疾宦官即日西歸後南部烏桓鮮卑畔公卿舉岐擢拜并州刺史岐欲奏守邊之策未及上會坐黨事因撰次以為禦寇論又是時綱維不攝閭閻專權

嘗擬前代連珠之書四十章上之留中不出而岐遂
遭黨錮去建安六年卒著孟子章句三輔決錄傳於
時

鄭昌字次卿泰山剛人弟弘字穉卿亦好學皆明經通
法律政事次卿為太原太守弘為南陽太守皆著治
蹟條教法度為後所述

臧旻臧洪父也有幹才達於政為漢良吏初為徐州從
事辟司徒府為盧奴令冀州牧舉尤異遷揚州刺史

丹陽太守轉拜長水校尉終太原太守所在有名

晉

荀藐或云浪武帝時為榆次令為政以德懷民時鳳集其境武帝下詔褒美云就之如日月敬之如神明愛之如父母樂之如時雨今縣南有荀政鄉藐去民思之故云

劉暉字長升東萊掖人毅子正直有父風為侍御史劾司徒王渾郭彭嘗曰我能截君角暉勃然曰天子法

官而欲截角乎求紙筆奏之彰不敢言遷太原內史
趙王倫之亂假征虜將軍不受與三王共舉義倫誅
入為左丞終右光祿大夫太子少傅散騎常侍後勸
王彌曹嶷歸正遇害

王陟永興二年任嵐州牧時劉淵稱帝將攻嵐石等州
劉琨與陟約拒寇陟曰公不負朝廷陟敢負公哉協
力守禦卒賴保全後陟既遷其地乃陷

北魏

元延為并州刺史道武皇始二年并州守將封真率其種族與徒河為逆將攻延延討平之

樓伏連代人忠厚有器量從征姚平於柴壁以功賜爵安邑侯為晉兵將軍并州刺史招誘西河曹成等七十餘人襲殺吐京護軍及其守士三百餘人并擒叛逆阿度支等二百餘家太宗嘉之拜成等將軍賜爵列侯後晉爵廣陵王薨謚恭

辛祥字萬福隴西狄道人紹光之孫也舉司州秀才太

傅元丕為并州刺史祥為府屬敕行建興郡轉并州
平北府司馬會刺史喪朝廷以其公清遂越長史敕
行州事祥初在司馬有白壁還兵藥道顯被誣為賊
官屬推處咸以為然祥曰道顯面有悲色察獄以色
其此之謂乎苦執申之月餘別獲真賊後除郢華二
州長史卒

荀孤為并州刺史不治產死之日家無餘財百姓追思
之

孫小字茂翹咸陽石安人夏時没入宮刑魏平統萬徙
平城以聰識有智畧稱屢著戰功賜爵泥陽子出為
冠軍將軍并州刺史晉爵中都侯州內四郡百餘人
詣闕頌其政化小嘗重郭祚門才以祚為主簿兼任
之以書記時人多之

韋孝寬字叔裕杜陵人以王思政薦為并州刺史鎮玉
壁兼攝南汾州事高歡以大衆來攻連營數十里盡
攻擊之術孝寬拒破之歡智力俱困因發疾夜遁去

軍中訛言丞相中弩死歡聞勉坐見諸貴使斛律金作勅勒之歌自和之哀感流涕西魏帝嘉孝寬功授驃騎大將軍進爵建忠郡公

北齊

李稚廉趙郡高邑人少而寡欲初不從家人有所求請嘗故以金寶授之終不取強付輒擲之於地州牧以其蒙稚而廉故名曰稚廉天平中高祖擢為泰州開府長史平北將軍稚廉緝諧將士軍民樂悅高祖頻

幸河東大相歎賞世宗嗣事除霸府掾謂杜弼曰并
州王者之基須好長史各舉所知時雅有所稱皆不
允衆人未答世宗乃謂陳元康曰我教君好長史處
李稚廉即其人也遂命為并州長史常在世宗第內
與隴西辛術等六人號為館客待以上賓之禮天保
初除安南將軍太原郡守天統中為并省都官尚書
武平五年三月卒於晉陽贈吏部尚書

王晞字叔朗北海劇人六世祖猛家於華山之鄜城晞

淹雅有器度好學不倦隨神武到晉陽補中外府功
曹參軍帶常山王演友齊天保初行太原郡事濟南
立常山王從駕除晞并州長史王還并除丞相府司
馬晞性閒淡寡慾雖王事鞅掌而雅操不移在并州
戎馬填閭未嘗以世務為累良辰美景嘯咏遨遊登
臨山水以談讌為事人士謂之物外司馬嘗詣晉祠
賦詩忽有相王使召晞不時至後仕至儀同三司隋
初卒於洛陽

蘇瓊字珍之武強人文襄以儀同開府引為刑獄參軍
每加勉勞并州嘗有彊盜長流參軍推其事所疑賊
並已拷伏失物家並識認唯不獲盜賊文襄付瓊更
令窮審乃別推得元景融等十餘人並獲賊驗文襄
大笑語前妄引賊者曰爾輩若不遇我好參軍幾致
枉死累遷南清河太守循聲尤著仕至大理卿卒於

周

隋

辛公義狄道人開皇中為并州刺史下車先至獄中露坐驗問獄囚十餘日斷決殆盡方還受訟皆不立文案訊問不盡應須禁者公義即宿廳事或諫曰君何自苦也答曰刺史無德令百姓繫於囹圄豈有禁人在獄而心自安乎罪人聞之咸自嘆服後訟者多兩讓而止

長孫行布河南洛陽人右驍衛將軍晟子仁壽中為漢王諒庫直甚見親狎於并州起兵南拒官軍留行布

城守遂與豆盧毓等閉門拒諒城陷遇害

張祥京兆人并州司馬時漢王諒反遣將劉建功縱火燒其郭祥於城西王母廟再拜泣禱曰百姓何罪致此焚燒神具有靈可降雨相救言訖雨降火遂滅士卒感其至誠莫不用命賊退以功授開府

郭湛大業中祁縣令時縣人張道源以孝稱湛改其所居曰復禮鄉至孝里

陶模京兆人性明敏有器幹仁壽初為嵐州司馬漢王

諒舉兵刺史喬鍾葵發兵將赴諒模拒之曰漢王所
圖不軌公荷國厚恩致位方伯謂當竭誠效命以答
慈造豈有寢園未淹翻為厲階鍾葵臨之以兵模辭
氣不撓鍾葵義而釋之軍吏請斬模以壓衆心遂囚
於獄諒平拜開府後從平楊元感以功進位銀青光
祿大夫

王威太原郡丞大業十三年義兵將起威與武牙郎將
高君雅相與疑懼請高祖禱雨晉祠將為不利晉陽

鄉長劉世龍知之以告高祖高祖執威君雅殺之

唐

劉文靜字肇仁京兆武功人大業末為晉陽令與晉陽
宮監裴寂善唐公鎮太原深自結託後坐李密姻屬
繫秦王入禁所視之文靜曰太原百姓避盜者皆入
此城文靜為令數年知其豪傑可得十萬人尊公所
領兵復且數萬君言出口誰敢不從秦王笑曰君言
正合人意文靜遂介寂以交唐公叱左右執斬王威

高君雅大將軍府建為軍司馬又轉大丞相府司馬
使哭厥始畢始遣二千騎隨文靜至又獻馬千
匹唐公喜曰非君何以致之尋敗桑顯和執屈突通
進授光祿大夫封魯國公唐初拜納言後拜民部尚
書領陝東道行臺在僕射為寂構害

殷嶠字開山雍州郿縣人仕隋太谷長有治名義兵起
召補大將軍府掾參預謀畧後封鄖國公卒諡節

張文瓘字稚圭貝州武城人貞觀初舉明經補并州參

軍時李勣為長史深禮之嘗嘆曰稚主今之管蕭吾
所不及勣入朝文瓘與屬僚二人皆餞勣贈以佩刀
玉帶而不及文瓘文瓘以疑請勣曰子無為嫌若某
猶豫少決故贈以刀欲其果于斷某放誕少檢故贈
以帶欲其守約束若子才無施不可焉用贈因極推
引歷拜同三品遂與勣同為宰相晉侍中兼太子賓
客卒諡曰懿

孫湛貞觀中為榆次令引洞渦水西流溉田民利之政

以嚴稱吏不敢犯

鄧義高宗時為祁縣令有異政邑人刻石頌之

張柬之字孟將襄陽人登進士第調清源丞永昌元年
以賢良召時年七十餘對策第一狄仁傑姚崇薦之
累拜鳳閣侍郎同平章事誅張易之昌宗以功擢天
官尚書同三品封漢陽郡王加特進為武三思所誣
貶瀧州卒景雲中贈中書令諡文貞

韋安石京兆萬年人孝寬曾孫舉明經永昌元年為并

州司馬有善政則天手勞之曰聞卿在彼庶事從心
善事表於能官仁明彰於鎮撫如此稱職深慰朕懷
俄拜并州刺史安石性持重少言笑為政清嚴所在
人吏咸畏憚之久視中拜鸞臺侍郎同平章事中書
令封郇國公景雲二年坐事出為蒲州刺史太常卿
姜皎有所請拒之皎弟御史中丞晦諷御史劾奏貶
籍憤卒後贈蒲州刺史天寶初諡文貞

富嘉謨雍州武功人舉進士長安中為晉陽尉與同官

吳少微友善先是撰碑頌皆以徐庾為宗嘉謨與少微屬詞皆以經典為本時人欽慕文體一變稱富吳體而太原人士實先化之嘉謨作雙龍泉頌乾燭谷頌少微撰崇福寺鐘銘詞最高雅作者推重長史張仁亶待以殊禮坐必同榻中興初歷左臺監察御史卒

吳少微新安人舉進士長安中官晉陽尉長史張仁亶重之嘗為撰進九鼎銘表神龍初以薦拜右臺監察

御史富嘉謨卒少微賦詩哭之尋病卒

谷倚魏郡人長安中官太原主簿以文詞著名與富嘉謨吳少微時人謂北京三傑後留寓客卒

張知泰蒲州河東人舉明經神龍中累拜御史封漁陽郡公以忤武三思出為并州刺史天兵軍使仍帶本官尋徙魏州卒諡曰定

呂元泰為清源尉神龍元年大水求言元泰上書言時政曰國家者至公之神器一正則難傾一傾則難正

今中興政化之始幾微之際可不慎哉自項營寺塔
度僧尼施與不絕非所謂急務也林胡數叛獯虜內
侵帑藏虛竭戶口亡散天下人失業不謂太平邊兵
未解不謂無事水旱為災不謂年登倉廩未實不謂
國富而乃驅役飢凍雕鑄木石營構不急勞費日深
恐非陛下中興之要也比見坊邑相率為渾脫隊駿
馬胡服名曰蘇莫遮旗鼓相當軍陣勢也騰逐喧譟
戰爭象也錦繡夸競害女工也督斂貧弱傷政體也

雜服相歡非雅樂也渾脫為號非美名也安可以禮
義之朝法侈靡之俗詩云京邑翼翼四方是則非先
王之禮樂而示則於四方臣所未諭書曰謀時寒若
何必羸形體灌衢路鼓舞跳躍而索寒焉書聞不報
嚴挺之華州華陰人景雲中舉進士開元二年為太原
少尹殿中監王毛仲嘗使太原朔方幽州計會兵馬
後累年仍牒太原索器仗挺之以不挾勅且毛仲寵
幸久恐有變故密奏之泣任嚴整更不敢犯及毛仲

得罪上以挺之言忠擢為刑部侍郎後李林甫嫉之
出歷絳州刺史上問曰嚴挺之安在此其才可用林
甫退召其弟損之曰上視絳州厚要當以事自解歸
得見上且大用挺之稱疾林甫得奏即言挺之願得
閒官自養上恨叱久之乃以為員外詹事卒

戴謙為文水縣令開元二年於縣東北五十里鑿甘泉
渠二十五里鑿蕩沙渠二十五里鑿靈長渠千畝渠
俱引文谷水傳溉田數千頃

杜暹濮州濮陽人舉明經開元十四年同平章事未幾
罷累轉太原尹二十年上幸北都晉戶部尚書許扈
蹕還封魏縣侯卒贈尚書右丞相謚貞孝暹公清勤
約不通獻遺所至以廉幹聞

韋濟鄭州武陽人隴右河西黜陟使恒子也開元中為
太原尹製先德詩四章述祖父之行辭致高雅天寶
中為尚書左丞濟從容雅度所蒞人推善政終馮翊
太守

李銳宗室子明皇時為太原少尹遷汾州刺史善於職
復為太原少尹築天城軍完緝邊備卒贈尚書右僕
射

安庭堅開元中為太谷縣令有德政邑人立碑以紀德
李殷為太谷令北京尹上言殷釐務公廉以德化下獄
無囚繫刑無鞭朴薪水之事不擾於民力賦興之數
不失於公程三時勸農躬行田井乾糶曝鐵裏行而
食一邑熙熙長幼有序流者歸復如戀父母今考秩

垂滿衆情願留敢希明恩重令治任詔下褒美量留
一年

楊仲續為祁令甚有德惠人為立祠

崔衍字著深州安平人太子賓客倫子天寶末擢明經
為清源令勸民力田懷附流亡觀察使馬燧表其能
徙美原累遷宣歙池觀察使

辛旻從李光弼定恒趙後署太原三城使史思明屯相
州及滏陽旻逆擊走之後守河陽卒

烏承玘字德潤張掖人累立戰功李光弼表為冠軍將軍封昌化郡王為石嶺軍使王思禮為節度使軍政倚辦焉

路審中徐州吏龐賊之亂著奇節累擢嵐州刺史鄭畋謂其節貫神明請擢為右羽林將軍詔可

後唐

何瓚閩人唐末舉進士及第莊宗為太原節度使辟為判官張承業卒代知留守事為人明敏通於吏事外

若疎簡而內頗周密馬步都虞候孟知祥等胥以軍禮見瓚常繩知祥以法莊宗建大號拜諫議大夫明宗時拜西川節度副使卒

李承勲為太原少尹晉王遣使燕賀冊尚父至燕而劉守光已僭號有司迫承勲稱臣承勲不屈以列國交聘禮入見守光怒殺之

後周

李穀字惟珍潁州汝陰人身長八尺容貌魁偉舉進士

漢乾祐中討河中掌轉運周廣順初拜中書侍郎平
章事仍判三司顯德中從征太原遇賊于高平匿山
谷中信宿而出追及乘輿世宗慰撫之命穀先調兵
食又代符彥卿判太原行府事師還進司空恭帝封
趙國公求歸洛宋建隆元年卒贈侍中

宋

田仁朗大名元城人宋初為內職開寶二年征太原與
陳承昭壅汾水灌城太平興國四年征太原與閻門

祇候劉緒按行太原城四面濠砦視梯衝器械太原
平留為兵馬鈐轄開廐使武再興軍器庫副使賈湜
並為巡檢俄命與再興役民築榆次新城端拱中卒
仁朗沈厚有謀畧所至著善政內職中咸以仁朗為
稱首

高繼勳字紹先瓊子咸平中遷洛苑使并代州鈐轄徙
屯岢嵐軍遼兵五萬屯草城川誘令南伏兵寒光嶺
大敗之遷弓箭庫使賜金帶錦袍徙麟府州鈐轄時

屯兵河外饋運不屬繼勲扼免毛川援送軍食師乃濟累遷馬軍副都指揮使授建雄軍節度使卒贈太尉後追封康王諡穆武

龔父咸平二年任榆次令營建廟學雅重士流

文彥博并州介休人天聖中以殿中丞署榆次縣事有思鳳亭記

張伯玉仁宗時為太谷令愛民勤政廣興水利邑民賴之尤以文章著名

張載字子厚郿人父迪殿中丞知涪州事載嘉祐二年
登進士第始仕祁縣司法遷丹徒雲巖縣令又遷著
作郎簽書渭州軍事判官熙寧二年冬被召入對除
崇文館校書明年移疾十年復召還館同知太常禮
院是年謁告西歸行至臨潼卒於館舍享年五十有
八塋於涪州墓南載學古力行以易為宗以中庸為
體以孔孟為法作關中士人宗師世稱橫渠先生著
正蒙東西銘行於世程灝言西銘理一而分殊擴前

聖所未發與孟子性善養氣之論同功淳祐初封鄆伯從祀孔子廟庭

滕甫字元發以字行知太原府河東兵勞民貧而土豪將吏皆利于有警故喜作邊事民不堪命甫始至蕃族來賀令曰謹斥堠無開邊隙有寇而失備與無寇而生事者皆斬自軍司馬沿邊安撫以下皆勒以軍法西人獵境上河外諸將請益兵甫曰寇來則死之吾不出一兵也河東十二將其四以備北其八以備

西八將更休為上下番是歲八月邊郡稱有警請八將皆上謂之防秋甫曰賊若并兵犯我雖八將不敵也若其不來四將足矣卒遣更休而將吏懼甚扣閣爭之甫指其頸曰吾已捨此矣頸可斷兵不可出卒無寇省芻粟十五萬河東之所患者鹽與和糴也甫稍更其法明著稅額而通鹽商配率糧草視物力高下而不以占田多少為差民以為便陽曲縣舊治城西汾決徙城中縣廢為荒田甫奏還之使縣堤防如

黃河民復成市諸將駐列城者長吏或不悅据誣以
事有至死者甫奏立法將有罪徙他郡訊驗諸將聞
之喜曰公保吾生當報以死西夏請復故地詔賜以
四塞而葭蘆隸河東甫曰取城易棄城難昔棄老哈
西人襲我不備喪金帛不貲且為所笑乃命部將柴
虎蕭士元以兵護遷號令嚴整寇不敢近無一瓦之
失將賜寨甫請先畫界而後棄不從西人已得地則
請凡畫界以綏德城為法從之甫曰若法綏德以二

十里為界則吳堡去葭蘆百二十里為失百里矣兵家以進退尺寸為強弱今一舉而失百里不可力爭之已而謀者得西人之謀曰吾將出勁兵于義吳二寨之間劫漢使不得出兵則二寨亦棄矣甫遂復申前議章九上至數萬言議者謂近世名將無及甫者甫為文與詩英發妙麗每出一篇學者爭誦之篤于行義事父母撫諸弟以孝友聞臨大事決大議毅然不計死生至於已私則小心莊栗惟恐有過其事上

及與人交馭將吏待妻子奴婢一以至誠仕至大理評事右光祿大夫龍圖閣學士上柱國南陽郡開國侯有文集二十卷

劉渙字仲章保塞人文質子以父任監并州倉天聖中上書請章獻后還政將黥隸呂夷簡薛奎力救得免後擢右正言會河東走馬承受奏渙他事坐貶尋知遼州熙寧中以工部尚書致仕卒

張岳字子雲府州府谷人為內殿崇班元昊破豐州與

諸將一日數戰破容州刺史雅布雅守貴三砦俘獲
萬計遷禮賓副使明鎬在河東以岢嵐軍當雲朔路
奏岢為麟府路駐泊都監兼沿邊都巡檢使駐岢嵐
張亢修瀕河堡障初議置安豐砦于石臺神岢以為
非要害地遂徙砦於生地骨堆以扼賊左右親信曰
擅易砦地可乎岢曰苟利國家得罪無憾也卒易之
已而本道上言左遷絳州兵馬都監二州未解嚴復
麟府駐泊都監屯安豐累遷洛苑使嘗從數騎夜入

羌中偵機事既還羌覺追之出隨羌疾馳效羌語與羌俱行數里乃得脫前後中流矢創發卒

馮京字當世鄂州江夏人舉進士自鄉舉禮部至廷試皆第一英宗時以端明殿學士知太原府神宗立召為翰林學士擢樞密副使時河東麟府豐三州城壘兵械不治官吏皆受譴京以先帥本道上章自劾曰使諸路帥臣知其雖一時脫去後能倖竊名位者猶必行法將不敢復偷惰曠職優詔不聽晉參知政事

出外又召知樞密院事致仕卒謚文簡京為郡守諸
縣公事報下捷疾一無壅滯人服其敏云

王素字仲儀莘人太尉旦季子賜進士出身熙寧初以
端明殿學士知太原府汾河大溢素曰若壞平泉遂
灌州城矣亟命具舟楫築堤以塹之一夕水驟至人
賴以安入知通進銀臺司致仕卒謚懿敏

司馬旦解州夏縣人池子以父任歷知祁縣天大旱人
乏食羣盜剽劫富家巨室至以兵自衛旦召富者開

以禍福於是爭出粟減直以糶猶不失其贏饑者獲濟盜患亦弭舉監在京百萬倉時祁隸太原以太原留不召仕至大中大夫卒

范純仁吳縣人仲淹子哲宗時判太原境內民貧多暴其親純仁遣屬收塋無主燼骨復櫬一路倣此時塋者以萬計後判國子監以劾王安石左遷河中府累官至尚書右僕射謚忠宣

范純禮純仁弟知太原初禁宰牛未得令會有牛死者

純禮以數百錢買瘞之宰牛者愧而自止每給糧官吏及軍士皆出一廩雖有濕惡衆無怨言

郭永大名府元城人少剛明勇決身長七尺鬚髯若神以祖任入官知太谷縣太原帥率用重臣每宴饗費千金取隸縣以給斂諸太谷者尤亟永以書抵幕府曰非什一而取皆民膏血也以資觴豆之費可乎脫不獲命令有投劾而歸耳府不敢迫縣有潭出雲歲旱巫乘此譁民永杖巫暴日中雨立至縣人立石紀

其異府遣卒數輩號警盜刺諸縣短長遊蠹不歸莫敢迂永械致之府府為并他縣追還部使者及郡文移有不便於民必條利病反復或遂寢而不行人謂永毋賈禍永曰知行吾志而已遑恤其它太谷人安其政以為自有令無永比者既去數年復過之則老稚遮留如永始去靖康末提點河東刑獄建炎初宗澤檄犄角大名遂殉城謚勇節

桑安世紹聖初知榆次縣事勸課農桑教民務本嘗引

澗河水曲折數十里溉田惠利不竭

陳知白為太原縣尉分引晉水灌田民用大饒

王舜臣元符二年任岢嵐牧時兵破夏寇擒其偽將翁
阿拉遼人代為請和舜臣上言爭之章惇納賂寢其
議祀名宦

鄭驤字潛翁信州玉山人元符進士通判岢嵐軍高宗
初以直秘閣知同州兼沿河安撫使殉城謚威愍

范純粹字德孺仲淹子用蔭入官徽宗初復寶文閣待

制知太原府後入黨禁復徽猷閣待制卒純粹沉毅有幹畧才應時須歷任胥以治辦聞

曾肇字子開建昌南豐人鞏弟第進士建中靖國中以龍圖閣學士知太原府崇寧中蔡京得政落職卒肇更十一州類多善政云

師範丹徒人崇寧初督竒嵐軍政守嵐時太原等十一郡地震彌旬晝夜不止壞城壁屋宇人畜死者甚衆範上言請復正臣豐稷去蔡卞邢恕呂嘉問安惇蹇

序辰奸佞以回天變蔡卞覩其奏大怒裂牘不使上
進傳假旨配嶺南去之時嵐人遮哭於道車馬不得
行

劉适武經郎政和三年任苛嵐牧政尚簡樸連理杏十
餘株生廳舍時以為德政所感

錢即字中道吳越王諸孫第進士徽宗時為徽猷閣待
制知太原府以童貫宣撫本道辭不許居二年以疾
提舉洞霄宮後童貫引為河北河東參謀以老固辭

致仕卒諡忠定

蘇過字叔黨眉州人軾子以詩賦解兩浙路禮部試下
任右承務郎徽宗時監太原府稅亟游晉溪終通判
中山府過圃名小斜川自號斜川居士時稱小坡蓋
以軾為大坡也

唐恪字欽叟杭州錢塘人以蔭登第知榆次縣豪子雄
於鄉萃逋庇姦不輸公賦前後莫敢詰恪以理善曉
之悟而自改折節為長者最聞擢提舉河東常平靖

康元年同知樞密院事為中書侍郎八月晉拜少宰
罷後以議張邦昌仰藥卒

陳從易字簡夫泉州晉江人第進士為嵐州團練推官
仕至龍圖閣直學士卒從易好古篤行歷官以清德
聞

盛子思崇寧間知榆次兼兵馬監押教閱保甲持身廉
慎文行政事皆可師法民口碑嘖嘖不置祀名宦

李諒宣和初知榆次兼管兵馬司公事性平恕富經術

政尚寬簡人以良牧稱之祀名宦

黃友字龍友溫州平陽人七歲能詩長入太學每謂同舍曰大丈夫不能為國立功是亦造化中贅物耳登崇寧五年進士第累立戰功除直秘閣時常勝軍郭藥師叛諸郡響應友率數千人躬冒矢石與戰欽宗召問稱嘆進直徽猷閣制置司參謀隨种師中解太原圍引兵奪榆次縣明日進十里而止友白師中以非地不聽嘆曰事去矣黎明士卒奔潰友被執寇曰

降即赦汝友厲聲曰男兒死耳罵不絕口寇怒以脂
蠟塗其身倒豎焚之朝廷贈官至中大夫御書忠節
傳家字旌其門閭官其後八人錫命有云緣廟謨之
失策致榆次之憤師兵盡道窮執節不撓特優贈典
用慰忠魂

金

盧孝儉宣德州人登天眷二年第調憲州軍事判官累
官太原少尹大定二年陝西用兵尚書省發本路稅

粟赴平涼充軍實期甚嚴迫孝儉輒易以金帛馳至
平涼用省而不失期并人稱之用廉晉官二階後以
轉運山東子用官帑及禍

蒲機知文水縣開常稔渠有碑記

烏庫哩德升益都路明安人明昌二年進士為絳陽軍
節度副使大安初除侍御史論西京留守赫舍哩執
中姦惡衛紹王不聽貞祐初以翰林侍讀權參知政
事出為汾陽軍節度使河東北路宣撫副使改知太

原府事權元帥左監軍興定元年元兵急攻太原糧道絕德升屢出兵戰道復通遷官一階二年真授左監軍行元帥府事元兵復圍太原環之數匝已破濠垣德升植柵為拒出其家銀幣及馬賞戰士元軍壞城西北隅以入德升聯車塞之三却三登矢石如雨守陴者不能立城破德升至府署謂其姑及妻曰吾守此數年不幸力窮乃自經死姑及妻皆自殺贈翰林學士承旨子烏蘭威幼詔以奉御俸養之

楊伯元字長卿開封尉氏縣人登大定二年進士第調
鄆城主簿進榆次令召為大理評事官至工部侍郎
累遷安武軍節度使以才幹多被委任為推排定課
使及審錄官人稱其平卒諡曰達祀名宦

史純大定間以忠顯校尉為陽曲縣令撫馴其民嘗禱
雨烈石祠有應自作記

楊邦基字德懋華陰人好學天眷二年登進士第為太
原交城令太原尹圖克坦恭貪汙不法託名鑄金佛命

屬縣輸金邦基獨不與圖克坦恭怒召至府將以手持鐵柱杖撞邦基面邦基不動承德廉察官吏尹與九縣令皆免去邦基以廉為河東第一召為禮部主事大定中同知西京留守事致仕卒

烏凌阿烏爾固納泰和三年為榆次令有識幹訟者立辯曲直無不允服

喬天翼為合河令元兵陷城不屈死嘉靖三十二年提學閔註以涖政有功臨難守節請登正祀

李好復中山安喜人爲榆次令安集流逋撲滅奸盜後入爲巡警使嘗縛一犯禁護衛寘於法人憚其嚴

元

馬英初遁跡石州金末避兵合河元署興州觀察使判官政成訟息惠愛及民嘉靖三十二年崇祀

攸哈喇巴圖渤海人善射戊寅授金虎符河東北路兵馬都元帥鎮太原修城池繕兵甲招降屬邑市肆不改遠近聞之皆相率來歸嘗微服夜出聞民間語曰

吾屬父母子女相失矣下令軍中凡俘獲有親者聽
贖無貲者官為贖之民得完聚者衆庚辰金梁知府
立西風寨奪耕牛哈喇巴圖殺梁知府驅耕牛還又
破隰州辛巳三月引甲騎十餘人救壽陽王胡莊道
三交大戰金兵遁五月金趙權府圍太原將騎三十
出西門金兵又遁癸未大敗金師於太谷縣甲申六
月平陵井寨乙酉二月清泉寨降石家昂亦降丁亥
五月奸人夜獻太原東門於武仙仙引兵入哈喇巴

圖鏖戰仙兵大至諸將自城門外呼曰當速出哈喇
巴圖曰真定史天倪平陽李守忠隰州田雄皆失守
矣我又棄太原將何面目見主上及國王乎家屬任
公等所俘吾誓與城存亡遂沒於陣太祖以其子幼
命其表弟王七十復守太原後又命哈喇巴圖長子
蒙古台嗣守太原

譚澄字彥清懷來人父資榮金末為交城令以縣來附
賜金符為元帥左都監仍兼交城今年四十移病舉

弟資用自代資用卒澄襲職澄幼穎敏為交城令時
年十九汾陽郭帥堰文谷水折以理令均其利於民
豪民持吏短長察得主名皆以法治之乙未籍民戶
有司多以浮客占籍及征賦逃竄殆盡官為稱貸民
無以償澄入覲因中書耶律楚材面陳其害太宗惻
然免之壬子復大籍民澄盡削交城之不土著者賦
以時集甲寅留世祖藩府而以其弟山代為交城令
胡祇遹字紹開磁州武安人至元元年忤阿哈瑪特為

太原路治中兼提舉本路鐵冶將以歲賦不辦責之及涖職乃以最聞改河東山西道提刑按察副使

程元直亳州人至元間為交城令勸農興學政平訟簡陞絳州守祀名宦

李德輝字仲實通州潞縣人年六十監酒豐州市筆札錄書夜誦不休中統中為山西宣尉使權勢之家籍民為奴者咸按而免之復業近千人至元元年授太原路總管時潛藩故傅相無有出為二千石者上以

太原難治故以德輝為守至郡崇學校表孝節勸耕
桑立社倉一權度凡可以阜民者無不為之嘉禾瑞
麥六出其境五年徵入七年命錄囚山西河東行至
懷仁民有魏氏發得木偶持告其妻為厭勝移數獄
詞皆具德輝察其寃知魏氏有愛妾疑妾將搆陷其
妻召妾鞠之不移時而服遂杖其夫而論妾以死時
稱神明

楊致道清苑人天歷二年由西河主簿陞文水縣令蒞

任五載清潔善撫字為諸縣最

程克明禹城人榆次尹下車首詢民瘼修舉惠政會歲饑勸富室出粟賑之所全活甚衆

張儉大同人延祐間自秀容主簿遷榆次尹為政公平斷獄明允旁邑訟有不直者咸來質成尤能以善迪人而喻以愛親敬長之道百姓愛之立德政碑

裕魯實克特穆爾延祐間治太谷公廉有為嘗請免太谷協濟庶民為立碑頌德

齊思恭大名路人先為國子助教元統間尹榆次涖政
嚴明豪猾斂跡邑人愛慕久而不衰

齊元夔樂城人至正間知興州撫字有方流移者咸復
其業民為立石

劉鏞忻州人至正間令榆次以儒飾吏筆翰如流時巨
寇劉入忽等自陝至潛出邑境鏞察其有異收之果
服人以為神代去民為立石誦之

李繼本東安人至正間以翰林檢討出為山西省理問

尋授太原府同知以文學政事著聲有文集行於世
楊克公河間景州人至正四年任興州知州革弊平訟
吏民思之嘉靖三十二年崇祀

侯洪字有容太原人舉進士初為離石判官進尹榆次
廉直無私遇事立決雖簿書纖悉不遺祀名宦

顏瑜曲阜人復聖公五十七代孫以行誼舉任陽曲教
諭訓迪士子殷殷不倦被賊執罵不絕口死之祀名
宦

山西通志卷八十七